

Karl Ettlinger (1882-1939)

## E baar Gewissensfrage

Herr Parrer, Se frage so viel bei der Beicht,  
Drum derf ich's bitte wage  
Unn Ihne selwer mal vielleicht  
Baar Kläänigkeite frage?

5

Zum ehrschte: dhate Se als Bub  
Noch nie en Abbel strenze,  
Kää Käuwer fange unn kää Frösch  
Unn nie die Schul net schwänze?

10

Sin Se mit ausgezogne Strimb  
Net in die Kich geschliche  
Unn hawwe sich gedenkt: vielleicht  
Gibbt's ebbes zu erwische?

15

Un hawwe Se verprichelt nie  
Die annern, schwächern Knawe?  
Un dhate Se mit verrzeh Jahr  
An Klapperstorch noch glaawe?

20

Un hawwe hämlich nie geraacht  
E Zigar, e verstunke?  
Unn hawwe nie ääns iwwer'n Dorscht  
Als Herr Student getrunke?

25

Unn hawwe nie Ihr Lewe lang  
E bissi notgeloge?  
Unn fiehlte zu de Mädercher  
Sich nie net hiegezoge?

30

»O nein, mein Sohn! das tat ich nie!«  
Sprach streng der Gottesstreiter.  
– Des is derr awwer werklich schad!

35 *Gottlob, ich war gescheiter!!*  
(143 words)

Quelle: <https://www.projekt-gutenberg.org/ettlingk/frankfor/chap029.html>